

## 27-bob. O‘limni qayd etish

*Qarang: O‘zbekiston Respublikasi Vazirlar Mahkamasining 2016-yil 14-noyabrdagi 387-sonli qarori bilan tasdiqlangan “Fuqarolik holati dalolatnomalarini qayd etish qoidolari”ning VII bobi (“O‘limni qayd etish”).*

### 223-modda. O‘limni qayd etish tartibi

O‘limni qayd etish marhumning yashash joyi yoki o‘lim sodir bo‘lgan joydagi fuqarolik holati dalolatnomalarini yozish organi tomonidan amalga oshiriladi.

Fuqaroni vafot etgan deb e‘lon qilish haqidagi sudning hal qiluv qaroriga asosan o‘limni qayd etish mazkur qarorni chiqargan sud joylashgan yerdagi fuqarolik holati dalolatnomalarini yozish organi tomonidan amalga oshiriladi.

Hayotining birinchi haftasi davomida o‘lgan bolalarning tug‘ilganligi va o‘limi tibbiy muassasa joylashgan yerdagi fuqarolik holati dalolatnomalarini yozish organida qayd etiladi.

O‘lim sodir bo‘lganligi haqidagi ariza o‘lim sodir bo‘lgan kuni yoki murda topilgach, uch kundan kechiktirmay berilishi zarur.

O‘limni fuqarolik holati dalolatnomalarini yozish organlarida qayd etmasdan marhumni dafn qilish taqiqlanadi.

### 224-modda. O‘limni qayd etishning alohida hollari

Temir yo‘l yoki avtomobil transportida sodir bo‘lgan o‘limni qayd etish yaqinroq joydagi fuqarolik holati dalolatnomalarini yozish organi tomonidan amalga oshirilishi mumkin.

Havo yoki suv kemasida sodir bo'lgan o'limni qayd etish havo kemasi yerga qo'ngan joydagi yoki suv kemasi to'xtagan portdagi fuqarolik holati dalolatnomalarini yozish organi tomonidan amalga oshirilishi mumkin.

Shaxsi aniqlanmaganlarning o'limini qayd etish davlat sog'liqni saqlash tizimi tibbiy muassasasining xabariga asosan shu muassasa joylashgan yerdagi fuqarolik holati dalolatnomalarini yozish organi tomonidan amalga oshiriladi. Bu hollarda o'lim haqidagi guvohnoma marhumning shaxsi aniqlangandan keyingina beriladi.

## 225-modda. O'limni qayd etishda taqdim etiladigan hujjatlar

O'limni qayd etish uchun fuqarolik holati dalolatnomalarini yozish organiga o'lim haqidagi tibbiy guvohnoma yoki sudning fuqaroni vafot etgan deb e'lon qilish haqidagi hal qiluv qarori, shuningdek marhumning shaxsini tasdiqlovchi hujjatlar taqdim etiladi.

*Qarang: “O‘zbekiston Respublikasi sog‘liqni saqlash muassasalarida tug‘ilganlik haqidagi tibbiy ma‘lumotnoma, perinatal o‘lim va o‘lim haqidagi tibbiy guvohnomalarni berish tartibi to‘g‘risida”gi yo‘riqnoma (ro‘yxat raqami 2089, 23.03.2010-y.).*